

Mia identità senza paroles

L'é l titol del concors endrezà dai Volontadives del lengaz del Comun general, con chela de engaissèr la jent de Fascia a palesèr sia identità a na vida moderna e gustégola

I Volontadives del lengaz del Comun general de Fascia met a jir l concors "Mia identità senza paroles", con chela de engaissèr duc i sentadins de Fascia a palesèr sia idea de identità travers na foto o n curt filmat.

L concors l'é out a duta la jent de Fascia, dai bec ai gregn, che vel portèr dant e moscèr sia identità, senza durèr la paroles te chesta ocajon, ma fajan cognoscer na pèrt de sia val, momenc de vita, situazions personèles e de la sozietà, ambient e natura, aspec del lurier, del turism, de l'economia o ence vèlch de astrat.

Fèr pèrt de n pòpol de mendranza defat vel dir aer daite de se vèlch da desvalif respet a l'autra persones.

vèlch da rich e originèl, na vida de pissèr, de viver e de esser che pel vegnir spartida e moscèda ai etres.

Identità no entenuda demò desche lengaz, tradizion o cultura ma ence desche vida de viver de la jent da mont, desche l lurier, la familia, i gropes, desche la religion, la sozietà, l sport e amò n muie de auter. I Volontadives del lengaz envia duc chi che é enteressé a prejentèr curc filmac, ence realisé dai joegn con si fonins, opura retrac de momenc che moscia o i é l simbol de l'identità ladina vedui ti etres o daite de se. Na vida moderna e gustégola de palesèr sie pensier apontin senza paroles.

I lurieres, retrac o filmac de no più che 2-3 menuc. originèi e

personèi, cogn vegnir mané ite travers la posta eletronica o la posta ordenèra opura amò porté a man a l'Ofize per i Servijes linguistics e culturai del Comun general dant che vae fora les 12.00 di 31 de jené del 2013.

Sarà l grop di Volontadives del lengaz che valutarà i lurieres rué, che vegnarà spartii te più categories aldò de l'età di partezipanc e de la sort de lurieres consegné e i vegnarà premié te l'aisciuda del 2013.

Per aer l bando o maor informazions se pel se oujer a l'Ofize per i Servijes linguistics e culturai del Comun general a la mail cultura@comungeneraldefascia.tn.it opura al numer de telefon 0462 - 762158.



I Volontadives del lengaz del Comun general de Fascia.

Leteratura alalergia dan la Cësa di Ladins

La Union di Ladins Gherdëina à metù a jì na sèira de leteratura cun cater de bon poec dla valedes ladines



L cunsèi dla Union di Ladins Gherdëina.

Leteratura - Autores ladins à liet dant poejes o tesé de prosa n la sèira ai 27 de lujio tl verzon dla Cësa di Ladins a Urtijèi, purtan l publich te na bela atmosfera, te n tlima de cumpania y aurela curta da se n sté sauri. Rafael Prugger, Carlo Suani y Elisabeth Oberbacher, prim segundo y terzo pest pra l cuncors interladin de poejes "Angelo Trebo", y Tobia Moroder che à arjont l prim pest pra l cuncors leterer "Auturs ladins scrij" à ncantà l publich cun paroles, cuncedes via una dlongia l'autra te na maniera particulera y povester nce nueva per chiche scutova su, ti dajan seneficat plu sot a cërta espressions. Cun n vocabuler drèt rich nes à uni autor fat jì ite te si mond.

Tres la sèira à menà cun savèi Milva Mussner; dut l cunsèi dla Union di Ladins de Gherdëina cun a cèl president Stefan Kasslatte se à cruzià a puntin dla urganisazion.

I autores y si opres

Tobia Moroder de Urtijèi, che à studià archeologia, nes à tl prim purtà tl ambient storich. Te na maniera particularmènt zerileda y da culèur à Moroder descrìt l raion y i pensieres de na persona de tèmp che à vivù per n dassenn ala fin dl 1300. L se trata n vedl che scrij su si sentimènc y si lecorc dla slata di Stetteneck che sarà fineda do che èl mor.

Elisabeth Oberbacher de Curvea à dat n cheder dla periodes dla vita dla persona, raprejentan la nfanzia cun la salietà, la junèza cun l preve, l'età da persona chersciuda ora cun

Poejies pra n bon bucon y de bon vin

Na bela atmosfera ie unida su cun la letura d'opres ma nce ajache mutons dla Scola de Mujiga à sunà cun l saxofonn. Al autores ti iel uni sèurandant na boza de vin cun etichetes scrites, fates a man da Tone da Cudan. Ala fin iel uni metù a lincant de bona bozes de vin cun etichetes particuleres fates aposta per chësta manifestazion da artisè cunesciui de Gherdëina. Edith Prugger, David Lardschneider y Tone da Cudan à pità l plu, dajan nsci nce n cuntribut ala Union di Ladins de Gherdëina. N se l'à



I sunadëures à lascià audi plu pec.

ciaculeda mpue', stajan deberieda, pudan nce ciarcè de bon vins o maiè vel' bucon.

Udan la mèisa de leteratura ladina metuda ora me èi damandà tan giut che la rujenada ladina sarà mo data inant da l'oma a fi. Rujenan cun un o l'auter èi audi minonghes d'uni sort. Dantaldut i autores fova drèt otimisè per cie che à da n fé cun chësc. Rafael Prugger che ie de Urtijèi ma sta a Milan rejona ladin cun si mutons. Èl miena che l ladin ne n'ie nia tan sterch ajache mè puec autores, filosofos o scienziac cunesciui scrijova te chësta rujenada. La minonga de Tobia Moroder ie chëla che la nfrastrutres se romp, ma la cultura resta. „Se penson al ciastel Stetteneck che ie uni descuri da puec ani vèjen che la natura desdruj la cosses materiele. La rujenada ladina alincontra à sèuravivù per prësciapuech 2000 ani.“ L ie perchël de gran mpurtanza che autores scrije tla rujenada d'oma per ne desmìncè nia chësta bela rujenada.

Rengraziamënc

Per chësta festa garateda rengrazia la Union di Ladins de Gherdëina dantaldut i autores, i sunadëures Pia Demetz, Alex Designori y Christian Senoner cun si maester Thomas Piazza, La Usc di Ladins y la Rai Ladina, i artisè che à fat l'etichètes dal vin Gregor Prugger, Albert Moroder y Tone da Cudan, Ivo Moroder che à purtà de bon vins y à nce abù l'idea dla degustazion cun cultura, Ivana Moroder, David Lardschneider,



Cunlauradëures dla sèira.



I autores Carlo Suani, Tobia Moroder, Elisabeth Oberbacher, y Rafael Prugger, che à liet dant n valguna de si opres. Dovia a man drèta Milva Mussner che à menà tres la sèira.

Marion Kostner, Veronika Insam, Sofia y Marie Stuflesser dla USC che à judà a njeniè ca l buffet y a sté pra banch, l Schiclub Gherdëina che à mprestà l mplant audio, l Chemun de Urtijèi che à mprestà l palch, la butèiga Conad che à fat n

mièur priesc pra la roba da maiè, Moritz Peristi che à njenja ca la luminazion, Rudi Funtanella che à dat la buandes y duc chëi che à judà ntëurite.

Sofia Stuflesser



Na bela atmosfera fòvel ntan la sèira de leteratura.

